

「國家社會科學基金重大項目」

何建明 主編

中國地方志
佛道教文獻匯纂

人物卷

(40)



國家圖書館出版社

【國家社會科學基金重大項目（11&ZD119）】

中國人民大學佛教與宗教學理論研究所

何建明 主編

中國地方志
佛道教文獻匯纂
人物卷
(40)

國家圖書館出版社

中國地方志佛道教文獻匯纂·人物卷
浙江省 嘉興市

嘉興府志

清·伊湯安修 馮應榴纂
清嘉慶六年（一八〇一）刻本
抄配

嘉興府志卷六十二

嘉興府知府 伊湯安 重輯

列傳十三

方外 附

古之教者處其一今之教者處其三老釋之教雖與吾
儒殊趨然其別善惡明感應亦足以翊贊世化爲愚者
警勸嘉禾多古寺刹羽客緇儒不乏勤修畸行伊昔相
傳不必以非儒家者流而槩斥之故總附於列傳後

嘉興縣

南北朝

張元之嘉興人陶隱居弟子建武中勅爲宗元館主又于

菌山澗上築臺以居時有白鶴來止遂名鶴臺

茅山志

唐

僧伽大師西域人曾卓錫嘉禾靈光寺見民家漁梁矰弋

交午苦諭宜別圖生計改業者甚衆旣行化至長安漸

露神異或身長二三尺或現十一面觀音相景龍二年

中宗迎入內道場尊爲國師尋出居薦福寺頂上有一

穴以絮塞之夜去絮香從穴出光照滿室先是於泗州

臨淮縣乞地建伽藍標下掘得古香積寺銘并金像一

軀上有普照王佛字中宗以天后廟諱改爲普光王寺

御書額賜之後溱身供養寺中

神僧傳

法相姓俞氏吳郡長水人大歷中於上京習毘尼道諸部同異無不該綜傳法東歸請學者如林吳郡太守奏于開元寺置戒壇相預臨壇之選有異鳥棲于座側講畢後翻然入雲會昌元年二月十日告弟子清濬清高曰吾當滅矣累足右脇而逝建塔于來蘇鄉之原

高僧傳

元慧平原內史陸機裔孫髫齡穎悟長而溫潤辭親出家空王寺受具住嘉禾之建興持三白法諷誦五部曼拏羅咸通中隨送佛中指骨舍利往鳳翔重真寺慧于佛前鍊左拇指以爲供養口誦法華不輟火盡灰飛色無

撓沮其指不踰月復生如故未幾示寂建塔于吳會之

間爲三白和尚

佛祖通載

德誠初參澧州藥山宏道儼禪師儼云子以後上無片瓦
下無錐地大闡吾宗與道吾雲巖二人爲道拜自離藥
山乘小舟往來松江朱涇以綸釣度日人號船子和尚
夾山善會禪師住京口鶴林寺道吾過之知其所待幾
令參船子會至朱涇見誠大拜宗旨辭行回顧再四誠
喚會回立起橈曰汝將謂別有處邪迺覆舟而逝咸道
十年僧藏暉卽其處建寺焉有撥棹歌二十九首呂益
柔爲序而刻之載機緣集

傳燈錄

五代

普明唐季人後晉天福年間移錫嘉禾建普明禪寺有牧

牛十頭復系之以圖明雲棲宏禪師爲之序

嘉興湯志

文偃嘉興人姓張氏幼依空王寺志澄律師出家後抵靈

樹參如敏禪師繼如敏開堂後漢高祖親臨請益文偃

曰目前無異路高祖大加欣賞文偃倡道靈樹雲門凡

三十年機緣語句立雲門宗之始乾德元年雄武推官

阮紹莊夢雲門禪師令上奏乞開塔有旨韶州守臣開

視見師真身如生乃迎赴闕供養逾月送歸山中謚大

慈元真宏明禪師

國朝雍正十一年

勅封慈雲匡真宏明禪師

十國春秋參佛祖
統紀浙江通志

皓端姓周氏嘉禾人九歲捨家入靈光精舍師授經法號

如宿習於四明阿育王寺遇希覺律師盛揚南山律端

一聽旋有通明武肅王錢氏召於羅漢寺演訓復令於

真身塔寺宣導于時有台教師者彼宗號爲第十祖端

依附之果了一心三觀遂撰金光明經隨文釋十卷由

是兩宗法要一經路通忠獻王賜紫衣別署大德號崇

法焉後誓不出門慕遠公之不渡虎溪也著述傳錄記

讀七十許卷

高僧
傳

宋

李道人紹興初往來秀州或求藥則以涕和垢膩爲丸與之病立愈因目爲李鼻涕劉延仲寓秀州道人過之有美酒恡不與告曰今日適無酒爲禮道人笑曰何不出牀頭珍珠泉待客劉大笑呼童取樽道人曰但將一空瓶來瓶至索紙覆之頃時香氣外溢座中皆醉明日劉有他客啟珍珠泉空無涓滴一日詣劉別曰後二十年某月日當於真州相見至期劉卒於真州

續文獻通考

湯道亨自號赤脚道人宋季引一猱云自金陵來猱大如人能主給使亨夜坐時舒光邦人推異爭飯之豐薄不

謝第言分定云施興日多因構庵以居名曰太古以延
圻四方雲水之客久之有軍士戲烹其豚食之亨即齋
客與所親訣別手偈云八十一年饒舌終日化緣不歇
重陽時節歸家一路清風明月遂端居而化

劉志

魯沐元風格高亮氣息深穩宋治平中從海南來與人不
交一言默對終日時有白鶴旋遶空中學士范公鎮建
來鶴軒以居之至元初猶存年三百餘歲

嘉興
陽志

遇賢長洲林氏子母夢吞大珠而孕貌怪口容雙拳七歲
沉大淵而衣不潤遂去家師嘉禾永安院可依往參龍
華球公發明心印歸居萌覺院惟事飲酒醉則成歌警

世時號林酒仙祥符二年上元凌晨浴罷就室握拳以
右拳左張其口而化鐵網珊瑚載張卽之書酒仙詩一
卷于淳祐八年刻石歷陽吳寬謂其詩意有高絕處若
寒山子之流

嘉興湯志參
橋李詩繫

惟正秀州人住杭州淨土院跨黃犢出入巾鉢悉挂角上
杭守蔣侍郎與爲方外友每至郡庭下犢談笑終日有
錦溪集冬不擁爐以蘆花作毯納足其中夏秋好玩月
盤膝大盆中浮池上自旋其盆嗟笑達旦生平不談禪
曰徒費言語煩萬衆爲敷演耳皇祐元年泊然而逝

吳志

惟湛義烏宋氏子父母逢異僧曰汝生子六人第五者宜

令出家後入道雙林覃思得度首謁神照復往依廣智
嘗白智曰師所從者我無疑焉若圓頓絕待之旨當須
自得後敷講於雲間超果大揚化道天台一宗振於三

吳自湛始熙寧六年三月跌坐而逝

劉志

淨曇嘉禾人晚住錢塘之法慧紹興丙寅夏辭歸付院事

四衆擁眎揮扇久之書偈曰道漢從來沒縫罅五十六

年成話霸今朝死去見閻王劍樹刀山得人怕遂打一

圓相曰噯一任諸人鑽龜打瓦收足而化

五燈會元

慧光若訥字希言初依竹庵刻志苦學久而嬰心病叩大
士口誦秘章夢大士灌以靈液寤失其疾嘗蒙內召請

經稱旨恩待甚隆壽八十二諡宗教廣慈法師

嘉興湯志

淨真秀州僧嘉熙三年錢江岸傾民將魚鼈淨真以偈呈
安撫趙端明曰海沸江河水接連民居衝蕩益憂煎投
身直入龍宮去要止驚濤勢拍天遂投于海三日而返
謂衆曰我在龍宮說法龍神聽受此塘不復崩矣語訖
復入于海安撫與民感德具述其事聞于朝勅賜護國
真法師立祠于杭之會靈祠

劉志

淨觀住嘉興寂光庵修淨土懺法十餘年謂弟子曰我後
二十七日行矣至期入龕端坐命衆念佛頃之脫去

吳志

師一號水庵東陽人俗姓馬少師法雲有異人目之曰僧

中龍也後住淨慈人謂臨濟再世投老嘉禾報恩寺入
寂書偈云平生要用使用死蛇偏解活弄一拳打破虛
空佛祖難窺鱗縫茶毘得五色舍利齒拳不壞

嘉興
湯志

元

塊北子姓蔣氏嘉興人蓬首垢面動靜不羈元至正初抵
松江坐太古園室已則歷市廛狂走人盡呼爲風子一
夕叩沈蒲團門大叫曰將蒲團來坐我沈異之導詣蔬
圃中坐地沈有所省發遂委俗僦身服役爲弟子由是
四方崇向爭施與以其地爲庵嘗有問者曰近思錄定
然後始有光明是金丹否塊北子曰賢且去味

嘗手書示沈曰不偏不倚立于中不着西邊不着東超
出東西南北外一毫頭上釣蒼龍一日語沈曰吾乘化

盡矣言絕而蛻

兩浙名賢外錄

得喜

案嘉興湯志作得嘉誤

姓錢氏童丕時依興聖權公雍染及長

登天目山叩中峰禪師獲元旨歸結庵北花園鑿基得

古碣刻錢喜二字中峰遂大書喜見二字匾其庵人以

喜菩薩稱之至順中遷盤龍塘不三年遂成勝利及卒

緇白送葬者數千人火後舍利晶瑩得之者如至寶爭

分互奪或拾片骨取撮灰襲藏供禱則舍利纍纍而生

至穿刷火所以求之

劉志